

皇朝詞林典故

卷一
之二

PL
2548
C55
1887
v.2

LIBRARY

MAR 24 1975

Micro

皇朝詞林典故卷一

聖諭

世祖章皇帝順治十年二月。

上幸內院。披閱繙譯五經。

諭諸臣曰。天德王道。備載於書。真萬世不易之理也。

是年五月。

上幸內院。問翰林各官何下直太早。大學士
范文程等奏曰。今日端午。是以下直
較早。

上顧謂羣臣曰。乘藉天休。猥圖安樂。人情盡
然。但欲希晏逸。必先習勤勞。俾國家大定。
其樂方永。若止圖安樂。嗜欲莫遏。先計身
家而後國。是其樂亦暫耳。卽如朕躬所行。

兢兢業業。期於盡善。故每樂聞諸臣之言。
但今之人。多有能言而不能行者。其故何
也。今日爲之。明日易之。弗克持久。是以不
能行耳。夫人孰無過。知過而改。卽爲善士。
儻自掩飾。謬以爲是。過乃滋長。咎斯甚矣。
朕與諸臣。果能共勤政務。裨益生民。天必
眷之。若人之所行不善。弗自省改。天必降

之以殃。尙能邀眷佑乎。至天不加眷佑而
委命於天。不知天之譴爾者。以爾之不善
也。豈有爾所行善。而天譴之者。昔商成湯
爲盛德之主。猶且檢身不及。改過不吝。若
明之正德帝。耽志嬉遊。怙過不悛。徒責善
於臣工。揆之脩己治人之道。烏乎可。縱使
臣工胥善。而君不改過遷善。何由而向化

耶。

聖祖仁皇帝康熙九年十月。

諭禮部。帝王勤求治理。必稽古典。學以資啟
沃之功。朕於政務餘閒。惟日研精經史。念
經筵日講。允屬大典。宜卽舉行。爾部其詳
察典例。擇吉具儀以聞。

十二年三月。

諭學士傳達禮曰。學問之道。在於實心研索。使視爲故事。講畢。卽置之度外。是徒務虛名。於身心何益。朕於諸臣進講後。每再三紬繹。卽心有所得。尤必考正於人。務求道理明徹乃止。至聽政之暇。無間寒暑。惟有讀書作字而已。因

御書一行賜觀曰。人君之學。不在此。朕非專

工書法。但暇時游情翰墨耳。

是年九月。

上諭講官熊賜履曰。大學格物二字。包括無餘。但其間有根本。有切要。非泛鶩於器數之末。爲支離無本之學也。又諭曰。天地古今。大本大原。祇是一理。故曰一以貫之。然則博文約禮工夫。合當如是。

是年十月。

上諭講官等曰。人心至靈。出入無鄉。一刻不親書冊。此心未免旁騖。朕在宮中。手不釋卷。正爲此也。

十四年二月。講官傳達禮進呈講章。得

旨。講章內書寫稱頌之言。雖係定例。但凡事

俱宜以實。如秉至誠而御物。體元善以宜民。固已媲美三王。躋隆二帝等語。似屬太過。著改奏。

十五年二月。講官喇沙里。徐元文。奏經筵講章得

旨。嗣後經筵講章。稱頌之處。不得過爲溢辭。但取切要。有裨實學。其諭各講官知之。

十六年三月。

上諭掌院學士喇沙里等曰。治道首崇儒雅。前有旨。令翰林官將所作詩賦詞章。及真行草書。不時進呈。後因吳逆反叛。軍務倥偬。遂未進呈。今四方漸定。正宜振興文教。翰林官有長於詞賦。及書法佳者。令繕寫進呈。

是年閏五月。

上諭講官等曰。爾等進講經書。皆內聖外王。修齊治平之道。朕亦孜孜詳詢。每講之時。必專意以聽。但學問無窮。不在徒言。惟當躬行實踐。方有益於所學。爾等仍愈加直言。毋有隱諱。以助朕好學進修之意。

十九年六月。

上以御書賜大學士等。諭曰。朕萬幾餘暇。留心經史。時取古人墨蹟臨摹。雖好慕不衰。未窺其堂奧。歲月既深。偶成卷軸。卿等佐理勤勞。朝夕問對。因思古之君臣。美惡皆可相勸。故以平日所書者。賜卿等。方將勉所未逮。非謂書法已工也。卿等其知朕意。又以

御書賜學士等諭曰。爾等日侍講筵。夙夜匪懈。啟沃之暇。每以朕書爲請。朕萬幾餘閒。研精典籍。間取古人墨蹟臨摹。爾等旣爲文學侍從之臣。卽有成就德業之責。故因所請。輒以頒賜。朕意其悉之。

二十一年八月。翰林院奏

經筵講章。

上曰。經筵所以講學修德大典也。講章須有勸戒箴規之意。乃稱啟沃。今講章內有道備君師功兼覆載。二語太過。其易之。

是月。

召牛鈕等。近御榻前。指示所臨法帖。

諭曰。此黃庭堅書。朕喜其清勁有秀氣。每於暇時。輒一臨摹。隨命取晉唐宋元明人字。

畫真蹟卷冊置榻上。

上手自指點開示。或誦其文句。至於終篇。或
詳其世代爵里事實。論其是非成敗美惡
之跡。至顏真卿書。

上曰。此魯公書。嚴氣正性。可想見其臨難風
節也。

二十二年八月。

重禮者。庶常等俱甚寒苦。自翰墨外。不應別有所取。前喇沙里在時。待伊等甚善。所以至今有感念者。至庫勒納。任學士以來。交際之風漸盛。爾等宜加洗剔。無負簡任之意。

是年三月。

上諭大學士等曰。朕前奉

太皇太后詣五臺山。覽觀山川形勢。一一親
厯其境。每臺所製碑文。出自一時結構。爾
等可詳加斟酌。近見漢人中。有自負才高。
所作文。不容人點竄。此習俗之可鄙。文之
所以不工也。

是年十月。

上南巡。泊舟燕子磯。讀書至三鼓。侍講學士

高士奇奏請宜少節養。

上諭曰朕自五齡卽知讀書。八齡踐祚。輒以學庸訓詁。詢之左右。求得大意。而後愉快。日所讀書。必使字字成誦。從來不肯自欺。及四子之書。旣已通貫。乃讀尙書。於典謨訓誥之中。體會古帝王孜孜求治之意。期見之施行。及讀大易。觀象玩占。於數聖人

扶陽抑陰。防微杜漸。垂世立教之精心。朕
皆反覆探索。必心與理會。不使纖毫扞格。
實覺義理悅心。故樂此不疲耳。

二十四年四月。

上諭大學士等曰。從來道德文章。原非二事。
能文之士。必須先明理。而學道之人。亦貴
能文章。朕觀周程張朱諸子之書。雖主於

明道不尚辭華。而其著作體裁簡要。晰理精深。何嘗不文質燦然。令人神解意釋。至近世則空疎不學之人。借理學以自文。其陋岸然自負爲儒者。究其意解。不出庸夫之見。真可鄙也。

是年五月。

上諭新選庶吉士張希良等曰。士子讀書稽

古。原。期。窮。理。致。用。平。居。砥。礪。廉。隅。敬。修。品。
行。皆。爲。異。日。服。官。莅。政。之。本。迨。登。仕。路。志。
在。功。名。未。免。奮。志。求。進。干。營。奔。競。喪。其。懷。
來。往。往。有。之。爾。多。士。從。田。間。來。甫。通。仕。籍。
務。宜。率。其。素。履。不。改。初。心。凡。授。內。外。職。任。
其。各。加。黽。勉。清。操。自。矢。恬。靜。寡。營。循。分。盡。
職。潔。已。愛。民。以。副。朕。造。就。人。才。至。意。

是年六月。

上諭扈從諸臣曰。朕喜觀書史。徧閱聖賢經傳。而通鑑一書。關於治道。尤爲切要。雖不時繙閱。恐有闕畧。故將資治通鑑綱目大全諸書。皆以硃筆手自點定。以通鑑綱目卷帙繁多。未攜至此。攜綱目彙纂。用備披覽。朕雖時時檢閱。然不能盡記。爾等職司

文翰其各以所攜書籍進覽。於是內閣翰
林院詹事府諸臣以通鑑文選諸書呈進。
上覽竟。復諭曰。凡文武各官皆須讀書。於古
今得失加意研究。爾等各攜諸書以備問
答。甚善。朕所點定之書。爾等亦試觀之。

二十五年四月。吏部以掌院學士員
缺。開列尹泰等請

旨。

上曰。翰林院學士。職任關係甚重。必學行兼優。方爲允當。滿漢學士得人。則詞林觀摩興起。咸勤學砥行。人才成就。有裨治道。匪淺。曩者喇沙里。居是官。其學問品行。詞林至今追述之。後來者俱不能及。朕觀尹泰。品有餘而才不足。任以詹事。則相宜。若用

爲學士。恐辦事不甚敏捷。庫勒納。任此職時。較他人爲優。通政使葛思忒。似亦可用。可將此二人。酌議來奏。

三十二年四月。

上諭大學士等曰。翰林官以文章爲職業。今人好講理學者。輒謂文章非關重務。宋之周程張朱。何嘗無文章。其言如是。其行亦

三才圖會
卷一
如是。今人果能如宋儒言行相顧。朕必嘉之。卽天下萬世亦皆心服之矣。傳翰林官知之。

四十一年十月。翰林院侍讀學士陳

元龍等。遵

旨。各書綾字一幅進呈。

上諭曰。學書須臨古人法帖。其用筆時。輕重

疎密。或疾或徐。各有體勢。宮中古法帖甚多。朕皆臨閱。有李北海書華山寺碑。字極大。臨摹雖難。朕不憚勞。必臨摹而後已。朕素性好此。久歷年所。毫無間斷也。

四十三年六月。

上諭講官等曰。古今講道學者甚多。尤好非議人。彼亦徒能言之。而言行相符者蓋寡。

是以朕不尙空言。斷不肯非議古人。何以言之。蓋人各有短長。棄短取長。始能盡人之材。若必求全責備。稍有欠缺。卽行指摘。此非忠恕之道也。故孔子當時。惟節取人之善。隱諱人之短。凡事求諸已。不非諸人。是豈可稍容私意於其間乎。又人見講道學之人。或不見用。輒爲太息。以爲果見用。

必有可觀。此徒見其空言而云然也。若果見用。言行亦未必相符。惟宋司馬光編輯資治通鑑。論斷古今。盡得其當。而後世論者。反未嘗置諸講道學之列。司馬光乃宋朝名相。言行相符。由此以觀。不在空言也。故君子先行後言。果如周程張朱。勉行道學之實者。自當見諸議論。若但以空言而

講道學。斷乎不可。朱子洵稱大儒。非泛言
道學者可比擬也。

是年七月。

上諭大學士翰林等官曰。朕自幼好臨池。每
日寫千餘字。從無間斷。凡古名人之墨蹟
石刻。無不細心臨摹。積今三十餘年。實亦
性之所好。卽朕清字。亦素敏速。從無錯誤。

凡批覽督撫摺子。及硃筆諭旨。皆朕親書。從不起稿。其事之稍有關係者。雖歲月經久。亦不遺忘。故批發之旨。俱存所司。朕處全無底稿也。

五十年二月。

諭大學士。從來經筵之設。皆帝王留心學問。勤求治理之意。但當期有實益。不可止飾。

虛文。朕觀前代講筵。人主惟端拱而聽。默無一言。如此。則雖人主不諳文義。臣下亦無由而知之。若明萬厯天啟之時。何嘗不舉行經筵。特存其名耳。朕御極五十年。聽政之暇。勤覽書籍。凡四書。五經。通鑑。性理等書。俱經研究。每儒臣逐日進講。朕輒先爲講解一過。遇有一句可疑。一字未協之。

處亦卽與諸臣反覆討論。期於義理貫通。而後已。蓋經筵本係大典。舉行之時。不可。以具文視也。

五十六年十一月。

上諭大學士等曰。朕蒞政五十餘年。海內昇平。皆恃衆大臣爲朕股肱耳目。朱子亦云。爲政在於得人。大小臣工。俱宜實心任事。

直言勿隱。方爲社稷蒼生之福。爲大臣者。當識大體。不可瑣屑刻薄。朕待大學士。尙書。侍郎。以至小臣。各有等級。若待大學士。與小臣無異。卽非禮也。又如翰林等。作詩寫字。作古文。或作時文。朕皆因材器使。未嘗求全責備也。

世宗憲皇帝雍正七年十月。

諭爾等翰林。自以文章爲職業。但須爲經世之文。華國之文。一切風雲月露之詞。何所用之。若旣改官以後。各有當盡之政務。人之心思才力。難以兼營。不可自負文人。荒其職守。蓋文章政治。理本相通。事無旁貸。急所當務。方爲盡職。至於賦詩飲酒。自附於晉人風流。此種惡習。所當深戒。而痛絕。

者也。爾等其共勉之。

皇朝詞林典故卷一

皇朝詞林典故卷二

聖諭

高宗純皇帝乾隆元年五月。

諭國家以科目取士。廷試之後。分別任用。或授庶常。或分部學習。或以縣令銓補。此因才器使之道。欲令士子各展所長。裨益政治。原非有用舍去取於其間也。聞向來士

子。因詞林地望資格。優於外任。每以得預
是選爲幸。及至引見後。輒於內用外用。妄
生計較。此狃於習俗見聞之陋。而於朝廷
優待士子之心。實未深悉。蓋今時縣令。所
轄土地人民。等於古者侯伯子男之國。撫
綏經理。實賴通材。故親民之官。所係最重。
果其才猷政績。卓然表著。類皆不次超擢。

膺斯任者。何得不力圖報稱。而更生企羨乎。若身預詞林之選者。其名實尤難相副。蓋文詞不工。於館職固爲有媿。即使詞采可觀。尙恐流爲浮華無用之士。務各砥礪廉隅。講求經術。漸致淹雅宏通。以無負選俊儲才之意。至於在部學習人員。分曹佐理。各有攸司。當念外省官吏。措置偶或失

宜。尙有內部爲之駁正。在部中所定章程。一經奏准通行。將來卽引爲成例。稍有舛錯。貽悞不少。安得不倍矢精勤。期免隕越。總之百司庶府。悉非榮利之階梯。政事文章。各有當修之職業。務宜屏除私意。免効忠良。庶幾識見日增。猷爲日著。士風吏治。漸臻上理。朕實於爾等有厚望焉。

二年五月。

上諭總理事務王大臣曰。昨考翰林詹事官員。以爲君難爲臣不易命題。雖各就所見。敷衍成文。朕爰就其文字以定優劣。至難與不易立言之本意。原有輕重。伊等尙未見及。人之言曰。爲君難爲臣不易。此以見爲君甚難。爲臣亦不易耳。蓋爲君者。以一

人立乎萬民之上。宗社之安危。生民之休戚。係焉。崇尚寬大。則啟廢弛之漸。稍爲振作。則長苛刻之風。言路不開。則耳目壅蔽。將欲達聰明目。而無稽之言。勿詢之謀。馳驚並進。不惟不足以集思廣益。且足以淆亂是非。卽以理折之。論者且謂其厭棄羣言。不能容納。稽之史冊。比比而是。試思堯

舜在上。都俞一堂。尙曰汝無面從。退有後
言。夫面謾腹誹。乃人臣莫大之罪。唐虞豈
容有此。以聖人之爲君。又豈忍逆詐億不
信。爲是過當之言。抑且諄諄致戒於庶頑
讒說。巧言令色。孔壬當必非無爲而發。卽
此一端。爲君之難。槩可知矣。至爲臣者。夙
夜靖共。奉公憂國。爲上爲德。爲下爲民。苟

非鞠躬盡瘁。求所以稱股肱心膂之任。殫
分猷宣力之能。不足以盡爲臣之道。故曰
不易。然較之爲君。究未至若彼其難也。譬
之飲食。曰不飽。則未及饜飫而已。曰飢則
窮餓困餒。不止於不能果腹矣。此立言輕
重之分。而讀書者不可以不察。傳曰。言豈
一端而已。固各有當也。又曰。及之而後知。

履之而後難。朕所見如此。聊宣示諸臣。並衆翰林知之。

是年十二月

諭。朕命翰林詹事科道諸臣錄呈經史。本欲以明義理之指歸。審設施之體要。所望切實敷陳。昌言不諱。如大易否泰剝復之幾。尙書危微治忽之旨。風雅正變美刺之殊。

春秋褒貶是非之實。與夫厯朝史鑑興衰
理亂所由。人材之進退。民生之疾苦。鑑往
古以儆無虞。善爲法而惡爲戒。庶披覽之
下。近之有助於正心誠意。推之有益於國
是民生。涑水通鑑之編。西山衍義之輯。政
治所資。前規具在。若有避諱之心。言得不
言失。言治不言亂。則非所謂竭忱納誨之

道。朕於六經諸史。誦覽研窮。再三熟復。義理之精妙。固樂於探求。怠荒之覆轍。亦時凜於炯鑑。諸臣各就意見所及。毋專取吉祥頌美之語。論理必極其周詳。論事必極其切當。務裨實用。勿尚膚詞。朕虛心採納。於諸臣章奏。尙屢降諭旨。令勿拘忌諱。況經傳之舊文。載籍之往事。更復何所避忌。

以避忌爲恭敬是大謬古人獻替之義亦且不知朕兼聽並觀之虛懷矣。

五年八月。

諭講官經筵之設原欲敷宣經旨以獻箴規。朕觀近日所進講章其間頌揚之辭多而箴規之義少殊非責難陳善君臣咨儆一堂之意。蓋人君臨御天下敷政寧人豈能

毫無闕失。正賴以古証今。獻可替否。庶收
經筵進講之益。若頌美過甚。不能實踐躬
行。反滋朕心之愧。此後務剴切敷陳。期有
裨於政治學問。勿尙鋪張溢美之虛文。而
無當於稽古典學之實義。

是年十月。

諭朕命翰詹科道諸臣。每日進呈經史講義。

原欲探聖賢之精蘊。爲致治寧人之本。道
統學術。無所不該。亦無往不貫。而兩年來。
諸臣條舉經史。各就所見爲說。而未有將
宋儒性理諸書。切實敷陳。與先儒相表裏
者。蓋近來留意詞章之學者。尙不乏人。而
究心理學者。蓋鮮。卽諸臣亦有於講章中
係以箴銘者。古人鑑槃几杖。有箴有銘。其

文也。卽其道也。今則以詞藻相尙。不過爲應制之具。是歧道與文而二之矣。總因居恒肄業。未曾於宋儒之書。沉潛往復。體之身心。以求聖賢之道。故其見於議論。止於如此。夫治統原於道統。學不正則道不明。有宋周程張朱子。於天人性命大本大原之所在。與夫用功節目之詳。得孔孟之心。

傳。而於理欲公私義利之界。辨之至明。循之則爲君子。悖之則爲小人。爲國家者。由之則治。失之則亂。實有裨於化民成俗。修己治人之要。所謂入聖之階梯。求道之塗轍也。學者精察而力行之。則蘊之爲德行。學皆實學。行之爲事業。治皆實功。此宋儒之書。所以有功後學。不可不講明而切究。

之也。今之說經者。間或援引漢唐箋疏之說。夫典章制度。漢唐諸儒有所傳述。考據固不可廢。而經術之精微。必宋儒參考而闡發之。然後聖人之微言大義。如揭日月而行也。惟是講學之人。有誠有僞。誠者不可多得。而僞者託於道德性命之說。欺世盜名。漸啟標榜門戶之害。此朕所深知。亦

朕所深惡。然不可以僞託者。獲罪於名教。遂置理學於不事。此何異於因噎而廢食乎。蓋爲己爲人之分。自孔子時早已明辨。而切戒之。學者正當持擇審處。存誠去僞。毋蹈徇外驚名之陋習。崇正學。則可以得醇儒正人心。厚風俗。培養國家之元氣。所係綦重。非徒口耳之勤。近功小補之術也。

朕願諸臣研精宋儒之書。以上溯六經之
闡奧。涵泳從容。優游漸漬。知爲灼知。得爲
實得。明體達用。以爲啟沃之資。治心修身。
以端教化之本。將國家收端人正士之用。
而儒先性命道德之旨。有功於世道人心
者。顯著於家國天下。朕於諸臣有厚望焉。

七年二月。

諭朕令翰林科道輪進經史講解。原以闡發經義。考訂史學也。而年來諸臣所進。往往借經史以牽引時事。或進獻詩賦。與經史本題無涉。甚失朕降旨之本意。卽如今日翰林周長發。進呈禮記講章。內稱皇上先詣齋宮齋宿。審定郊祀樂章。禮明樂備。千載一時。宜其誠敬感格。未郊之先。瑞雪屢

降齋祀之際。風日晴和。大禮旣成。宜宣付
史館等語。夫

郊

廟禮樂。乃

皇祖

皇考久定之成規。朕不過畧加叅定。並非創
爲制作也。至於

郊祀之時。風日晴和。亦適逢其會耳。況江南
淮徐現被水災。朕方憂勞。儆惕宵旰。不遑
豈肯聽受諛詞。而遂以爲瑞應乎。周長發
著嚴飭行。並將此旨傳諭翰林科道等知
之。

八年六月。監察御史陳仁奏考試翰
詹諸臣。不用詩賦。宜試以經學註疏。

全史原委。以覘其學術經濟。

上曰。陳仁所奏亦是。朕前日考試翰林。原有論題。以觀其學問經濟。並非專用詩賦也。如李清植。卽因其論有根底。是以拔置一等。至於詩賦。原係翰林素應通曉者。聲韻之學。難以猝辦。以此考試。亦可驗其平日用功與否。如必試以經學註疏。全史原委。

更恐難其人矣。且卽有其人。亦遂能必其
文行相孚。坐言而起行乎。陳仁有進言之
責。其意原屬可嘉也。原摺並發。

十一年九月。

諭。朕命翰林科道官輪日進講經史。本欲研
究經術。闡明義理。以淑心身。以鑑興廢。而
諸臣論講。往往闌入條陳。若實有裨政務。

則亦何害。要不當借端立說。以逞私見也。
卽朕回鑾後數日內。如檢討程恂舉程子
一命之士。苟留心愛物。於人必有所濟一
條。因請重縣尉之選。欲以士人初任是官
而重其秩。是一縣又增一令也。成何政體。
再朕向曾留心詩賦。不過學問中之一事。
時於幾餘遣興偶命近臣屬和。亦前代翰

林典故中所有。並非誇耀已長。與文人角勝。而治天下之大經大法。端不在此。詞臣以文字爲職業。自當雅贍優嫻。方不愧清華之選。其中才學充裕。如張鵬翀。沈德潛等。間或一加超擢。而躁進之徒。競思進獻。若借此可以爲梯榮之捷徑。不知沈德潛優陞閣學。朕原因其爲人誠實謹厚。且憐。

其晚遇。是以稠疊加恩。以勵老成積學之士。張鵬翀則素知其敏捷。且資俸已深。厯陞詹事。初不因進詩優擢。若謂朕進用人。才沾沾於文藝之末。雕章琢句。專事浮華。此風一熾。必有藉手捉刀。希圖僥倖者。豈不玷玉堂而貽羞文苑耶。其務殫實心。崇正學。明大體。以無負稽古論思之厚望。

十四年正月。

諭進呈經史一事。朕初意欲博綜古義。廣摛羣言。以成執兩用中之治。且可因言觀人。究悉諸臣學識之高下。心術之真僞。其有闡入時政。於事理未當者。間加訓飭。自舉行以來。諸臣按日奏御。朕一一披閱。十餘年於茲矣。所稱洞達天人。發明道奧者。亦

殊不槩見。茲據御史金相奏稱。分班進書。人數多寡不齊。請均勻輪派。則是以進書爲煩苦。朕前亦聞有此論而不信。今金相旣顯爲此言。是諸臣未必不各有此見。且已行之十餘載。漸成故套。進呈經史之處。著停止。所有積年存留諸摺。交南書房翰林。擇其有裨經義政治者。薈萃成篇。用廣

中秘之藏。朕將親覽焉。

二十五年正月。

諭。御史吉夢熊奏。經筵事宜一摺。所言是非
參半。其中有應行採擇者。有事不必行。且
已屢經降旨飭禁者。如講官係朕簡用大
員。經筵講章。本應自行撰擬。期副獻納論
思之義。乃故事相沿。竟有由翰林院循例

屬稿者。朕於講官呈本時。尙爲研討折衷。
著爲經書二論。務在自抒心得。而侍案敷
陳者。顧以成言誦習。聊爲塞責可乎。該御
史所奏。實爲近理。嗣後將此明著爲令。至
稱二十二史通鑑綱目諸書內。有關治道
者。應俱令其進講一條。此則可以不必。帝
王宥密單心。緝熙典學。豈專恃此。每歲春

秋雨舉之文。特以典禮崇重。必與廷臣面
詢稽古。乃足懋昭嚮學親賢至意。夫經書
義蘊畢賅。天德王道之大端。實爲兼貫。初
無待旁及史鑑。以浩博相誇。且朕幾餘披
覽。於古今治亂得失之故。研窮往復。現在
自頒發正史之外。於通鑑一書。特勅儒臣
分條修輯。彙冊陸續進呈。朕精研訂正。凡

中有所見。必親加評騭。務期理明事覈。以成善本。若僅於進講時。敷衍一二則。以爲甄綜史事。無論挂一漏萬。徒爲具文。正昔人所謂一部全史。從何處說起者也。又稱講章在於簡約。不必以駢麗爲工云云。此則向來久經訓飭之事。卽如殿試策內。士子多用頌語。朕以其無關實政。尙令一切

屏除。况講筵自有體裁。何取冗詞長語。以富麗爲工。前諭諄諄。講官當所素悉。向後當有則改之。無則加勉。以光鉅典。是用別白宣示。俾中外共知之。

三十一年五月。

諭。今日國史館進呈新纂列傳內。洪承疇傳。於故明唐王朱聿釗。加以僞字。於義未爲。

允協明至崇禎甲申。其統已亡。然福王之
在江寧。尙與宋南渡相髣髴。卽唐桂諸王。
轉徙閩滇。苟延一綫。亦與宋帝昞帝昺之
播遷海嶠無異。且唐王等皆明室子孫。其
封號亦其先世相承。非若異姓僭竊。及草
賊擁立一朱姓。以爲號召者可比。固不必
槩從貶斥也。當國家戡定之初。於不順命

者。自當斥之曰僞。以一耳目而齊心志。今承平百有餘年。纂輯一代國史。傳信天下。萬世一字所繫。予奪攸分。必當衷於至是以昭史法。昨批閱通鑑輯覽至宋末事。如元兵旣入臨安。帝羃身爲俘虜。宋社旣屋。統系卽亡。昞曷二王。竄居窮海。殘喘僅存。併不得比於紹興偏安之局。乃續綱目。尙

以景炎祥興大書紀年。曲徇不公於史例。亦未當。因特加釐正。批示大旨。使名分秩然。用垂炯戒。若明之唐王。桂王。於是曷亦復何異。設竟以爲僞。則又所謂矯枉過正。弗協事理之平。卽明末諸臣。如黃道周。史可法等。在當時抗拒王師。固誅戮之所必及。今平情而論。諸臣各爲其主。節義究不

容掩。朕方嘉予之。又豈可槩以僞臣目之乎。總裁等承修國史。於明季事皆從貶。固本朝臣子。立言之體。但此書皆朕親加閱定。何必拘牽顧忌。漫無區別。不準於天理人情之至當乎。朕權衡庶務。一秉至公。況國史筆削。事關法戒。所係於綱常名教者至重。比事固當徵實。正名尤貴持平。特明

降諭旨。俾史館諸臣。咸喻朕意。奉爲準繩。
用彰大中至正之道。

三十六年十二月。

諭。前以批閱通鑑輯覽。見前史所載遼金元
人地官名。率多承譌襲謬。輾轉失真。又復
詮解附會。支離無當。甚於對音中曲寓褒
貶。尤爲鄙陋可笑。蓋由章句迂生。旣不能

深通譯語。兼且逞其私智。高下其手。訛以傳訛。從未有能正其失者。我國家當一統同文之盛。凡索倫蒙古之隸臣僕。供宿衛者。朕皆得親爲諮訪。於其言語聲音。俱能一一稽考。無纖微之誤。是以每因摛文評史。推闡及之。並命館臣就遼金元史國語解內。人地職官氏族。及一切名物象數。詳

悉釐正。每條兼系以國書。證以三合切韻。俾一字一音。咸歸脗合。並爲分類箋釋。各從本來意義。以次進呈。朕爲親加裁定。期於折衷至是。一訂舊史之踳駁。今金國語解業已訂正。歲事而諸史原文。尙未改定。若俟遼元國語續成彙訂。未免多需時日。著交方畧館。卽將金史原本先行校勘。除

史中事實。久布方策。毋庸復有增損外。其
人地職官氏族等。俱依新定字音。確覈改
正。其遼元二史。俟國語解告竣後。亦卽視
金史之例。次第釐訂。畫一。仍添派纂修官
分司其事。總裁等綜理考覈。分帙進覽。候
定。用昭闡疑傳信之至意。一切事宜。著總
裁等卽行議奏。

四十七年正月三十日。

諭。昨閱進呈一統志內。國朝松江府祇載王
頊齡王鴻緒諸人。而不載張照。其意或因
張照從前辦理貴州苗疆。曾經獲罪。又其
獄中所題白雲亭詩。語意感憤。經朕明降
諭旨。宣示中外。因而此次纂辦一統志。竟
將伊姓氏里居。槩從刪削。殊屬非是。張照

不知朕辦理其案之公而反挾私怨悵。誠
非大臣公忠體國。精白一心之道。然其文
彩風流。實不愧其鄉賢董其昌。卽董其昌
亦豈純全之正人君子哉。使竟不登志乘。
傳示藝林。致一代文人學士。不數十年。竟
歸泯沒。可乎。況從前張照之獲罪。因疑爲
鄂爾泰傾陷。其獄中憤怨之詞。大都指摘

鄂爾泰者居多。不知朕非信讒言之主。而鄂爾泰又豈能讒張照之人。嗣念張照究係可用之材。因出之囹圄。不數年間。由內閣學士。洊擢刑部尙書。內廷供奉。是朕之待張照。終始成全。原不以一眚之微。終使擯棄。可謂極儒臣之榮遇。卽將來國史中。亦當令載筆之臣。將伊事蹟詳晰編入。何

此時纂辦一統志。轉佚其名耶。總之張照
雖不得爲醇儒。而其資學明敏。書法精工。
實爲海內所共推重。瑕瑜不掩。公論自在。
所有此次進呈之一統志。卽將張照宦秩
出處事跡。一併載入。其各省志書。或有似
此者。纂修諸臣。皆宜查明奏聞補入。將此
通諭中外知之。

五十年二月。

諭。滿洲由科目出身爲翰林者。本應認真讀書。通達事理。爲國家有用之才。方名稱其實。向來滿洲之習舉業者。其文義本屬淺陋。及倖登科目。列名翰苑。問以文學。則曰身係滿洲。豈漢人可比。及至問以清語騎射。又曰我係詞林。豈同武夫戰卒。兩處躲

跟進退失據。而落於無用之流。朕所深惡。

卽從前尹繼善。鄂容安。鍾音。觀保等。在翰

林中。俱稱出色者。止能隨常辦事。而於邊

疆重務。並不能經理裕如。雖其中鄂容安

曾膺軍旅重寄。臨危遇變。亦唯知一死塞

責。究於國家大事。何所裨補耶。此次考試

翰詹。嚴加甄別。滿員出缺甚多。除簡擢數

人外。餘竟無員可補。與其濫竽充數。毋寧核實酌裁。所有現出之侍讀侍講學士二缺。侍讀侍講二缺。已令降旨裁汰。嗣後滿洲人員。益當自知愧勉。讀書敦行。砥礪成材。以備國家器使。如果能蒸蒸日上。一變從前積習。人材蔚興。彼時朕自當再補還舊額也。

五十五年十月。

諭。朕披閱臣工等所進萬壽歌頌。有尙書房行走侍講吳壽昌恭紀九言詩一冊。上下句用韻分叶。體製新穎。詩句藻麗。其詞章雖屬可觀。不免有騁博見才之意。因思尙書房翰林。入教皇子皇孫等讀書。惟須立品端純。藉資輔導。原不同應舉求名者。僅

在文藝詞章之末。況皇子及皇孫年長者。學業已成。其年幼之皇孫。皇曾孫。皇元孫等。甫經就傅。不過章句誦讀之功。尙屬易於啟迪。選擇師傅。祇當以品行爲先。與其徒藉詞藻華而不實。轉不若樸誠循謹之人。尙可資其坐鎮。卽如阿肅學問雖未優長。而資格已深。人亦謹飭。於皇子師傅頗

屬相宜。現在皇子等俱已年長。尙書房翰林等皆係皇孫皇曾孫皇元孫之師傅。若以外間師弟世誼而論。行輩多屬相等。且有誼屬晚輩者。在皇子師傅。親身訓課。自不至於交結干求。而輩行較晚之師傅等。分同賓友。恐不安本分之人。藉以結納交通。致有如從前秦雄褒與皇孫綿德往來。

交納之事。不可不防其漸。向來尚書房師
傳缺出。係掌院學士自行揀選。僅會同內
閣帶領引見。今阿桂嵇璜俱已年老。精力
不周。嗣後著大學士等公同揀選。不必專
取才華。務擇資深立品之員。帶領引見。候
朕簡用。至皇子皇孫等與尚書房師傅朝
夕晤對。祇須勸勉訓課。不得泛論文藝。相

聚閒談爲俗例倡和之舉。致啟夤緣。倘或該員等有營求干結之事。一經發覺。朕必照綿德秦雄褒之例。從重治罪。決不寬貸。著將此旨。恭錄一道。交尚書房存記。俾知警惕。

皇上嘉慶元年四月奉

高宗純皇帝勅旨諭。昨庶吉士散館。適朕連

日盼望雨澤。兼盼楚省捷音。未免焦勞倍切。心緒不寧。隨手繙閱。於賦彙內偶檢汙卮爲題。賦彙原非僻書。學習詞章者。原應留心檢閱。乃庶吉士等。俱不知傳咸所作。竟似作爲元結之窪尊。以致傳會失旨。雖禮記內汙尊。挾飲汙字。原讀烏花切。但尊與卮原本不同。轉似朕有意試以難冷題。

皇朝詩林典故 卷二
不知朕向來命題。從不故求隱僻者。且書籍甚繁。讀書人豈能一一記誦。朕並不以此加之責備。當自引以爲過耳。庶吉士等惟當益加勉力。勤學好問。以副朕教誨。矜全至意。不必心存愧懼也。

六年六月。

諭。御史和靜奏請。將翰林院編檢以上及

各部五品司員。輪班召見一摺。所奏殊屬非是我朝。

列祖

列宗。臨御寰宇。

宵旰勤求。召見廷臣。從無虛日。所以集思廣益。鑒別人才。

家法相承。實可萬年遵守。若明代諸君。深居

宮禁卽宰輔大臣尚有經年累月未曾
召及者。諸務廢弛。下情阻抑。職此之由。
益足徵

列聖貽謀。意至深遠也。朕自親政以來。恪遵
成憲。每日延見臣僚。多至十餘人。習以爲常。
豫防壅蔽。第國家班聯大小。自有次序。
外任府道以上。京員京堂以上。用以諮

訪地方利弊。講求政治。於廣詢博採之中。仍示以限制。若朕於應行輪對之人。久未召見。司言責者。自當執簡陳奏。今該御史請翰林自編檢以上。各部院五品司員。俱照各衙門值日之期輪次召見。試思各部院司員。其才具較優者。旣經該堂官保薦。其餘二三等司員。設該

堂官素日相待平常。於召見之時。或有挾私妄奏。紛紛告訐。必致礙難辦理。是延見庶僚。徒多無益。甚至開小臣熒聽莠言亂政之階。於事甚有關係。且在京五品司員。旣准召見。則外省如同知知州等官。亦將紛紛召見。是庶司百職。竟欲朕一人親理。有是政體乎。况各部院

司員及編檢中書等員。遇有出差復命者。俱得隨時召見。立法原屬詳備。至編檢各員。六年大考。亦係奉行舊例。其有才具優長者。原可隨時擢用。並非專以一試遽判升沉。今該御史意欲一體召見。竟可毋庸大考。此必係規避考試之翰林等倡爲此論。以便藏拙。看來此奏

亦非出自該御史之意。徒受人指使耳。
所奏俱不可行。原摺著擲還。

八年十一月。

諭。朱珪英和奏請將敬一亭兩旁舊刻前
明嘉靖六年兩碑。細爲刮磨。恭繕乾隆
九年

臨幸翰林院

諭旨。及朕此次幸院諭旨。摹勒豐碑。以光盛典。並抄錄明時碑文進呈。固屬臣下尊崇本朝令典之意。但前明所建兩碑。幾及三百年。且詳閱碑文。係飭修明倫大典。古帝王之勅諭。亦不可輕去。若磨去原碑。將我朝幸院鴻儀。改爲刊泐。亦不足以昭盛美。所有前明兩碑。著毋庸更

動。朱珪等既欲摹刻

皇考高宗純皇帝諭旨。及朕此次諭旨。著於
該院署內製造扁額。敬謹書寫懸掛。垂
示藝林。永彰盛軌。

皇朝詞林典故卷二

臣等竊惟濟川和鼎。有唐帝之贊言。宏道
右文。傳宋宗之手詔。自昔崇儒之代。典學
之君。往往宏獎詞林。特申渙號。良以簪毫
金馬。珥筆彤螭。陪法從之清嚴。備承明之
著述。職專獻納。地邇恩華。所有重巽天申。
寓策勵於褒嘉。以鼓舞爲敦勗也。我

朝

聖祖

神宗重光濟美。聿崇儒術。優禮詞臣。星雲賡載之
篇。魚藻獻酬之句。既已珠駢玉列。鑑耀古
今。而

綸綍之昭宣。臣鄰之獎勛。簡則數十字。繁或累百
言。無非嘉職業之克勤。示寵光之不易。木
天丹地。勉儲楨幹之材。秋實春華。宜戒輪
轅之飾。煌煌

天語。尤足輝蓬閭而勒箴銘。茲編既專立

天章一門恭載

列聖

御製而

開國以來

綸音詔旨。所以褒異儒臣者。謹列爲

聖諭。宸冠簡端。其因事

特降之旨。則分載各門卷內。以見我

朝於侍從諸臣。

恩明誼美。如是其優且渥焉。而躬逢

景運。祇誦

恩言者。宜何如鶴竦鳬企。感激奮興。以無負黼黻

隆平之責也。

臣

朱珪

臣

覺羅長麟

臣

英和拜手

稽首敬跋。



